

La via dil salit

Fatgs 16,17

Brev pastorala per la Cureisma 2019

da

msgr. dr. Vitus Huonder

Uestg da Cuera

*La brev pastorala ei da preleger en tuts survetschs divins
l'emprema dumengia da Cureisma,
ils 10 da mars 2019.
Ella sa vegnir publicada ellas medias
naven dils 11 da mars 2019.*

*Cuera, igl 1. da schaner 2019
Otgavel da Nadal
Fiasta da Maria la mumma da Diu*

PRÉAMBLA

Cara lectura,
car lectur

Quei ei mia davosa brev pastorala per la cureisma, damai che miu uffeci sco uestg da Cuera finescha probablamein ils 21 d'avrel 2019, la fiasta dalla levada da Niessegner. Perquei less jeu *resumar*, tgei ch'ei urgentamein necessari da saver per la via da nossa cardientscha. A moda cuorta, sco igl ei indicau per in scriver che duei vegnir prelegius el survetsch divin, less jeu accentuar ils *puncts centrals da nies confess catolic*. Jeu clomel en memoria tgei ch'ei indispensabel per la veta cristiana, oravontut en vesta ad in temps da gronda malsegirtad ella cardientscha, gie d'in temps trubistgau.

Medemamein hai jeu en mira da far attents sin ils *cuntegns essenziali* da nossa cardientscha che carstgauns duessen saver che vulan enconuscher meglier ed acceptar nossa religiun catolica – e da lezs dat ei buca paucs.

Aschia ei quella brev in cuort scriver accumpignont, ina sort préambla, in spot da reclama per la “constituziun” da nossa cardientscha, dalla Sontga Scartira e dalla presentaziun extendida da nossa ductrina el Catechissem dalla Baselia Catolica.

Frars e soras el Segner

Il profetisar ei in fenomen da tuts temps. Era Paulus e Silas han entupau sin lur viadi missiunaric a Filippi ina dunna cun in spért da profezia. Quella dunna ha enconuschiu la missiun dils dus umens ed ha griu suenter ad els: *Quels carstgauns ein survients digl Altissim Diu; els annunzian a vus la via dil salit* (Fatgs 16,17). Gie, la via digl evangeli che Paulus e Silas annunzian, ei la *via dil salit*. Quei ha quella dunna, quei ha il spért en ella constatau endretg. Paulus e Silas eran nunzis da quella via. Enconuscher ed ir ella, ei il giavisch da mintga carstgaun che desiderescha il salit.

Formula cuorta dalla cardientscha

Damai che la via digl evangeli ei la *via dil salit*, sa Paulus dir a nus ella lecziun per l'emprema dumengia da cureisma: *...sche ti confessas cun tia bucca che Jesus ei il Signur e creias en tiu cor che Dieus ha leventau el dils morts, vegns ti a vegnir salvus* (Ro 10,9). Quei ei ina *formula cuorta da nossa cardientscha*. Quella cardientscha duei sesviluppar e secumprovar en nies mintgadi. Oravontut stuein nus saver, tgei ch'ella munta

per nossa veta. Tgi dat a nus sclariment? Tgi declara a nus quella formula cuorta?

Fundament dalla via

Il fundament da nossa cardientscha e la premissa per la *via dil salit* ei la *tema da Diu*. Pieder animescha nus leutier en sia emprema brev cun suandonts plaids: *E sche vus numneis Bab quel che giudichescha scadin tenor sias ovras senza risguard dalla persuna, lu stueis vus viver en tema da Diu, aschiditg che vus essas pelegrins sin tiara* (1 Pd 1,17)! La *tema da Diu* ei nuot auter che la cardientscha en Diu. La *tema da Diu* ei la devota e respectusa carezia enviers Diu. Sin quei baghegia nossa veta.

Dar vinavon la cardientscha

Tgei munta ina veta en *tema da Diu*? Tgei munta in veta sin la *via dil salit*? Tgei risposta dein nus, sch'enzatgi vul saver co nus mein la *via dil salit*? Cun auters plaids secloma la damonda: Tgei s'auda tier ina *veta cristiana*? La damonda vegn lu aunc pli urgenta, sch'enzatgi vul surprender la cardientscha catolica; sch'enzatgi elegia la via dalla conversiun e di: *Jeu less daventar catolics*. Co

introducìn nus carstgauns ella *via dil salit*? Tgei schein nus per saver dar vinavon la cardientscha?

Sentupada cun Jesus

La via dil salit entscheiva cun la *sentupada cun Jesus*. Pertgei el ei *la via e la verdad e la veta* (Gn 14,6). El ei il Fegl da Diu. La *sentupada cun Jesus* ei l'entschatta da nossa cardientscha cristiana. Tgi che vul ir la *via dil salit*, sto emprendre d'enconuscher Jesus. El sto s'approfundar els evangelis. El sto ver sper el in carstgaun ch'ei *tschaffaus* cumpleinamein da Jesus (conf. Fil 3,12). El sto haver in carstgaun sper el che sa dir sco Paulus: *Jeu quentel tut per in disavantatg en veta alla surabundonta enconuschientscha da Cristus Jesus miu Signur. Per amur dad el hai jeu dau vi tut e taxeschel ei sco rumien, sinaquei che jeu gudogni Cristus e resti en el* (Fil 3,8-9).

Incorporaziun ella Baselgia

Tgi che di Jesus, di era *Baselgia*. Pertgei Jesus sez ha clamau en veta la *Baselgia* (conf. Mt 16,18). El careza la *Baselgia* ed ei seunfrius per ella per sanctificar ella (conf. Ef 5,25-26). Perquei ei la *via dil salit* era la via dalla *Baselgia*. Jesus gie, *Baselgia na!* Quei secumporta buc.

Quei secumporta era lu buc, cu la fatscha dalla Baselgia vegn disfigurada da biars da ses fegls e sias feglias. Lu pér da dretg stuein nus esser premurai che la Baselgia cumpari avon il Segner *sontga e senza macla* (conf. Ef 5,27).

Retscheiver ils sacraments

Cu Jesus ha clamau en veta la Baselgia, ha el regalau ad ella ina *veta spirituala*. Quella veta sesviluppescha entras ils *sacraments*. Ils *siat sacraments* ein in dun da Niessegner. Els effectueschan la veta dalla Baselgia. Els effectueschan quella veta, perquei ch'els regalan a nus la veta da Jesus, sia grazia, siu Spert, il Spert sogn. Els neschan ord si'unfrenda vid la crusch. Els cuoran ord il cor dil Crucifigau (conf. Gn 19,34). Aschi savens che nus retschevein els, vegnin nus expiai e sanctificai. Tier ina conversiun, gie tier mintga instrucziun ella cardientscha ha ina buna introducziun ella veta sacramentala dalla Baselgia preferenza.

Tener il camondaments

Sche nus suandein ils fastitgs da Jesus e prendein serius ses plaids, eis ei indispensabel da menar ina veta *sontga*.

Quei munta denton era: Nus savein buc ir sper ils *camondaments da Diu* ora. Pertgei els ein dai a nus per nossa sanctificaziun. Els ein il schurmetg per nossa sontgadat. *Buca tertgei che jeu seigi vegnius per annullar la lescha ni ils profets... Tgi che annullescha in da quels camondaments, e sch'ei fuss il pli pign, ed instruescha aschia ils carstgauns, vegn quintaus per il pli pign el reginavel da tschiel* (Mt 5,17.19), di a nus il Segner. Perquei ei nossa veta in cuntinuau cumbat encunter il puccau. Pertgei il puccau ei malgiustia e sedrezza encunter ils camondaments da Diu. Con impurtont ch'igl ei da tener ils camondaments da Diu, di Jesus a nus culs plaids: *Sche ti vul pia entrar ella veta, tegn ils camondaments* (Mt 19,17).

Tedlar la Baselgia

Il cartent ei mai persuls. El anfla, sco nus vein gia constatau, in da casa ella *Baselgia*. El anfla in da casa en ina cuminonza che ei, dapi sia fundaziun entras il Segner, sesviluppada sur tschentaners e che porscha a nus entras reha experientscha agid e segirtad. Perquei eis ei buca mo necessari d'appartener alla Baselgia, mobein dad era tedlar ella (conf. Mt 18,17). Quei munta tedlar quels che

portan sin incarica dil Segner responsablidad per la cuminonza dalla Baselia, oravontut il Papa ed ils uestgs. En quei grau ei Niessegner rigurus, damai ch'el di als giuvnals: *Tgi che teidla vus, teidla mei, e tgi che renviescha vus, renviescha mei. E tgi che renviescha mei, renviescha quel che ha tarmess mei* (Lc 10,16). Per quei ein era las *directivas dalla Baselia* da muntada per la *via dil salit*. Leutier sto denton era vegnir detg ch'il Papa ed ils uestgs ein obligai all'entira tradiziun dalla Baselia ed astgan buca untgir dalla ductrina artada. Els astgan buca agir a moda arbitraria.

Indicaziuns praticas

Jeu concludel quella *cuorta survesta* cun entginas indicaziuns praticas per la *via dil salit*: *Urei mintga di, silmeins la damaun e la sera. Separticipai stediamein alla sontga Messa, en scadin cass mintga dumengia. Adurei savens il Segner el Sontgissim Sacrament. Recumandei vusezs adina puspei alla mumma da Diu. Urei bugen il rusari. Renovei vossa veta, renovei la grazia dil Batten regularmein entras il sogn sacrament dalla penetiencia.* En miu temps da giuventetgna vegneva la confessiun ensemen cun la communiun meinsila recumandada.

Se preparei cun premura per la *celebraziun annuala dallas Pastgas*. Evitei, sco igl apiestel di, *pitinem* e scadin *puccau* (conf. 1 Cor 6,18). Teni vies *tgierp* sogns, damai ch'el ei in tempel dil Spert sogn (conf. 1 Cor 6,19) ed in member da Cristus (conf. 1 Cor 6,15). Fagei dil *bien* a tuts carstgauns, cunzun a quels ch'ei a nus datier ella cardientscha (conf. Gal 6,10).

Plaid final

Bugen accumpognel jeu vus cun mia benedicziun episcopala. Jeu vegnel buc a tralaschar d'urar adina per vus e d'unfrir per vus la sontg'unfrenda e jeu recamondel vus oravontut a Nossadunna da Cuera.

Ludaus sei Jesus Cristus!

Cun cordials salids

+ Vitus, uestg da Cuera

